

Far paun sco avon 100 onns

Il mulin Morissen daventa luvratori d'eveniment dil Museum regional Surselva

■ (sib) Cun quater luvratoris d'eveniment vul il Museum regional Surselva porscher dapli che objects da contemplar. In dils luvratoris ei il mulin Morissen, nua che affons san far paun sco avon 100 onns. Tochen alla fin dalla secunda uiara mundiala era il mulin da Morissen en funcziun cun ina roda mulin sper in dutg che culava tras il vitg. Suentar ei il dutg svanius ed in motor d'electricitad ha surpriu la lavur dall'ava. Tochen els onns sissonta vivevan ins a Morissen per gronda part dils agens products, per lu han ils emprems pasterners d'ordeifer entschiet a furnir paun. Aschia han ins duvrau il mulin pli e pli pauc per far frina da paun. Avon entgins onns seigien els sedecidi da renovar il stabiliment, raquenta *Luregn Giusep Riedi* che fa il pedel dil mulin niev. Oz se presenta quel cun in local separau grond e modern, nua ch'ei ha in grond fuorn ed ina cuschina. Ussa ha il Museum regional Surselva encuretgh la collaboraziun cun la vischnaunca da Morissen che posseda il baghetg. Sut il tetel «Frina e paun» porscha il museum el mulin da Morissen in da quater luvratoris d'eveniment.

Historia e historias

A Morissen vesan affons co las dunnas fagevan paun all'entschatta dil davos tschentaner. Sut l'instrucziun da *Pirmina Nay* vegn ei fatg fiug l'entschatta en furnel cun in uadel. La pasta san ils affons truschar in quart d'ura culs mauns en ina mosa – in truc da lenn. Il graun deriva d'in pur da Morissen e vegn mu-



El niev mulin a Morissen san affons far paun sco avon tschien onns e leutier mirar co la frina vegn mulada a moda veglia.

MAR

laus da *Luregn Giusep Riedi*. Igl indrez ch'il pur pensiunau demonstrescha han ins medemamein restaurau completa-mein. Igl indrez ei numnadamein quel ch'ei vegnius installaus suenter 1945.

Pirmina Nay completescha l'instrucziun cun fatgs historics ed anecdotes davart il far paun els vitgs sursilvans. Il foss confessiunai calava gnanc tiel far paun. Fer-ton ch'ils catolics fagevan treis cruschs

silla pasta avon che schar levar quella havess ina dunna reformada mai fatg quei. Ils affons fan leutier aunc ina pasta da pizza, e per emplenir quella san els ir a cumprar en ella stizun dil vitg. Igl avon-

miezdi va a fin cun in quiz historic ed igl gentar comunabel.

Ils treis auters luvratoris d'eveniment han liug el museum regional a Glion. *Ely Hauer* meina leu ils workshops «Dil fil alla teila» e «Far lischiva». Fer-ton ch'ei va egl emprem per la tecnica da filar e da teisser, muossa il secund la veta e la lavur dallas lavunzas. Il luvratori «Paun sur la burnida» sefatschenta medemamein cun la via dil graun al paun. *Pirmina Nay* che ha fatg paun da pign ensi cun sia mumma ei era responsabla per quei luvratori.

Carmalar las scolars el museum

«Ils luvratoris d'eveniment dueien pli dentar en emprema lingia gruppas dad affons», ha la menadra dil Museum regional Surselva *Carin Cadonau* declarau. Savens sappien ils scolasts buc tgei far cun lur scolars el museum, di ella. «Ils luvratoris d'eveniment dueien esser in impuls da nezegiar dapli il museum per l'instrucziun en scola.» Tier tut ils quater luvratoris dat ei ina mappa da documentaziun ch'il scolast sa duvrar ell'instrucziun. La purschida nova dil museum sedrezza denton era a hosps da vacanzas. Per quei intent ha il museum priu si contact cun tut ils meinascola e camps d'affons, plinavon han els ediu in prospect niev ch'ei d'anflar els biros da turissem e hotels. Il luvratori a Morissen sa il museum era organisar per carschi. Per l'auter onn quenta *Carin Cadonau* cun ulteriurs luvratoris d'eveniment. Ils mistregns dad umens maunchien aunc en lur program, ha la menadra dil Museum regional Surselva concediu.